



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : POOI TO MIDDLE SCHOOL
學校名稱 : 香港培道中學 香港培道中學
Name of Play 劇名 : 第三選擇
Script writer 劇作者 : 黃穎琳、霍泳欣、陳藝允、曾綽嵐 (學生)

Synopsis 故事大綱:

穎希快要考DSE時，面對大學選科的人生抉擇——選擇自己喜歡的歷史還是擅長的商科。她在中三選科時因覺得選商科出路較多而選擇放棄選修歷史科，但鍾情於歷史的她在課餘時仍然會閱讀歷史書。由於中三時已放棄了一次歷史，穎希認為大學選科是第二次機會，但擔心文科出路少，害怕不能給予母親一個更好的生活，在兩者之間多番掙扎。在興趣和現實之間，穎希和其他同學都有其掙扎和苦惱，大家都選擇了各自適合的路。

穎希會再放棄一次歷史嗎？還是興趣和現實可以取得平衡？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

序幕

(燈亮。一個身穿黑裙，戴着黑色面紗的女子出場，她手持一朵沙漠玫瑰，在舞台徘徊。音樂起。)

黑衣女子 VO： 沙漠玫瑰既花語係猶豫與矛盾，相傳得到此花祝福既人，既會擁有成熟既品格，同時亦都會充滿矛盾。

(燈暗，序幕完。)



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第一場

場景：學校教員室外

(放學鐘聲)

(穎希揸住書包，手抱住幾本歷史書前往教員室。)

穎希：(對着教員室外對講機)我係 6A 班李穎希。我想搵陳老師，唔該！

老師：(老師出來)咦？穎希，搵我有咩事啊？

穎希：陳老師，我想問下你有關 **Jupas** 嘅嘢.....

老師：無問題啊。(見希心事重重)唔洗擔心咁多，你最近 **Mock Exam** 考得唔錯，我有信心你會入到三大既 **Accounting**。

穎希：但係...我想揀歷史.....我之前中三其實都諗住揀中史㗎.....但係大家都話商科出路好，第時容易搵份好工.....所以我先.....其實我一直都好中意中史呢科，呢三年黎我自己都有 **Keep** 住讀唔同嘅歷史書.....

老師：喲，「你中意讀歷史書」同「你中意讀歷史系」，其實係兩回事來，你要明白讀一個學科同興趣係有分別，而且大學既內容比較深，你自學未必跟得上。

穎希：老師，我有 **Check** 過㗎，好多大學揀讀歷史系冇限定選修課嘅額外要求，我明白咁樣揀好似風險有啲大，但係老師，我可以讀到歷史系㗎！

老師：穎希，其實老師唔係想逼你揀商科，但係我覺得我都有責任將現實嘅情況講返俾你聽，有啲師姐中學選修商科，到大學轉修文科，但畢業之後搵工果陣，就發覺出路會窄啲。

穎希：嗯.....知道。(停頓)陳老師，你大學揀科嗰陣有無猶疑過架？係咪一早諗好要讀咩？

老師：都唔係架，老師都用左一段時間去搵自己鍾意嘅嘢，一開頭我係揀商科，出左黎社會做嘢之後，發現自己更加鍾意教書、對住學生。

穎希：你係點樣發現自己鍾意教書架？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

老師： 係一次幫姨甥女補習，發現原來自己都鍾意講嘢、分享自己點樣學習。嗰陣返左成日工，同佢補習嗰陣都仲會好興奮。

穎希： 哦.....我好驚揀左會後悔。

老師： 其實最終選擇權係你度，其他人都只係比到意見你，幫唔到你做決定，你再好好諗下啦。

(穎希與老師道別後，係操場坐低，佢打開歷史書，睇住睇住，彷彿進入了書中的歷史空間。)

(戰爭音樂出。)

(歷史書內容：宋理宗開慶元年，蒙古軍向南侵略，宋朝出兵抵禦。將領文天祥在崖山遭敵軍俘虜後被押送到蒙古首都。蒙古可汗忽必烈欣賞文天祥的膽識與忠貞，希望他投降效命元朝。)

忽必烈： 過咗咁耐，文天祥仲未肯投降？！

大臣： 可汗，文天祥呢個人對宋朝忠心耿耿，我哋當佢係貴賓宴請佢，佢竟然成晚都唔飲唔食！我哋用佢家人去要挾佢，佢竟然都無動於衷！勸佢投降，佢竟然破口大罵，話自己誓死只會效忠宋朝，無論開出任何條件，佢都只會選擇宋朝。軟硬兼施，我哋真係冇曬辦法啦！

忽必烈： 文天祥呢個人忠心耿耿，學識淵博，如果能為我朝所用，必定如虎添翼；但若然佢唔肯投降，都唔能夠繼續留住佢，以免釀成大患。來人，處決文天祥啦！

(士兵到獄中準備將文天祥帶往刑場。)

士兵： 唉，我都唔明你，可汗對你都仁至義盡啦，只要你肯投降，金銀珠寶、榮華富貴享之不盡，而宋朝根本已經當你死咗，你又何必同自己過唔去呢？

文天祥： (仰天一笑) 人生自古誰無死，留取丹心照汗青！你覺得榮華富貴係人生至高理想，但係我眼中都不過係過眼雲煙。我文天祥生係宋朝人，死係宋朝鬼。就算再俾多一次機會我揀，我都唔會後悔自己今日嘅決定！(說畢，文天祥走到穎希身邊，對着穎希說) 姑娘，「意欲為之，則不悔之」，珍重！

(士兵帶着文天祥往刑場退幕，留下穎希一人深思。日向靜悄悄走到穎希後方)

日向： 喂！睇咩睇得咁入神？

穎希： (回過神來) 哦！冇啊，歷史書咋嘛。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

日向： 又睇歷史書？仲有一個月就考 DSE，睇返你啲 BAFS notes 啦。（穎希嘆氣）

日向： 嘩.....好少見我既小希子（或任何花名）咁苦惱架喎。因為屋企問題？

穎希： 唔係呀，我無野喎～

日向： 嘩～你睇下你條眉皺到，死左五百隻蚊啦。我決定要為啲蚊默哀。（做默哀動作）（穎希笑了，二人相視而笑）

穎希： 無啊，咪又係揀科啲嘢囉.....

日向： 你仲要諗咩？

穎希： em.....我諗緊好唔好揀歷史.....

日向： 吓！！！！

穎希： 你唔好咁大聲啦，我仲諗緊㗎.....

日向： 你痴線㗎？你商科成績咁好，你諗清楚未㗎？

穎希： 我都唔知，諗到我大學要讀啲我無咁鍾意既科，我真係好唔想.....

日向： 你知係香港鍾意唔可以當飯食㗎。

（二人靜默）

穎希： 咁你係咪以後唔打排球啦？

日向： 打啊，打到死都打。

穎希： 你又話鍾意唔可以當飯食既。

日向： 係啊，不過係香港都唔會餓死既。同埋我淨係叻打排球咋嘛。（穎希緊握手上既歷史書）

日向： 我就話無得揀姐，你有得揀喎。

穎希： 我都想好似文天祥咁。

日向： 你講咩啊？

穎希： 無啊！（拿沙漠玫瑰書簽出來，正想蓋上書。）